

Nos igitur certam de præmissis notitiam non habentes, ac Abbatem, & singulares personas Conuentus huiusmodi à quibusuis excommunicationis, suspensionis, & interdicti, aliisque Ecclesiasticis sententijs, censuris, & pœnis, à iure vel ab homine, quauis occasione, vel causa latis, si quibus quomodolibet innodat. existunt, ad effectum præsentium dumtaxat consequendum, harum serie absoluentes, & absolutas fore censentes, huiusmodi supplicationibus inclinati. Fraternitati tuæ per præsentem committimus, & mandamus, vt vocatis omnibus qui fuerint euocandi, ac bonis & decimis præfatis prius coram te specificatis, de præmissis te diligenter informes, & si per informationem eandem venditionem, & exemptionem, ac pretij huiusmodi conuersionem, si fiant, in euidentem dicti Monasterij vtilitatem cessuras repereris, super quo tuam conscientiam oneramus, Abbati & Conuentui præfatis bona præfata meliorem conditionem offerentibus vendendi, ac Incolas territorij Zuricani à solutione decimarum dicto Monasterio debiturum pro pretio inter Abbatem & Conuentum, ac Incolas præfatos conueniendò eximendi, ita tamen quòd propter exemptionem huiusmodi non intelligatur translatum ius exigendi decimas in dictos Incolas, & dummodo venditio, & pretij conuersio vnico contextu fiant, licentiam auctoritate nostra concedas.

Non obstant. fel: rec: PAVLI II. prædecessoris nostri de rebus Ecclesiæ non alienandis, ac alijs constitutionibus, & ordinationibus Apostolicis, necnon Monasterij, & Ordinis præfatorum etiam iuramento, confirmatione Apostolica, vel quauis firmitate alia roboratis, statutis, & consuetudinibus, priuilegijs quoque, indultis, & litteris Apostolicis, sub quibuscunque tenoribus, & formis, ac cum quibusuis clausulis, & decretis in contrarium præmissorum quomodolibet concessis, confirmatis, & approbatis. Quibus omnibus & singulis, eorum tenores præsentibus pro expressis habentes, hac vice dumtaxat specialiter, & expressè derogamus, cæterisque contrarijs quibuscunque. Dat. Romæ apud S. Marcum sub Annulo Piscatoris die xxv. Iunij. M. D. C. IX. a Pontificatu Nostri Anno Quinto.

S. Cobeilius.

I. Sauenier.

Locus annuli Piscatoris.
